

**SISTEMA DE INTERCAMBIO ENTRE CENTROS  
UNIVERSITARIOS ESPAÑOIS  
(SICUE)**

**Curso 2010-2011**

000708 25.01.2010 10 55

## CONVOCATORIA

**RESOLUCIÓN DE 25 DE XANEIRO DE 2010 POLA QUE SE CONVOCAN PRAZAS DE MOBILIDADE PARA ESTUDANTES DA UNIVERSIDADE DE SANTIAGO DE COMPOSTELA (USC) QUE SE ACOLLAN AO SISTEMA DE INTERCAMBIO CON UNIVERSIDADES ESPAÑOLAS (SICUE) PARA O CURSO 2010-2011.**

### OBXECTO DA CONVOCATORIA

A USC a través da Vicerreitoría de Política Internacional convoca 1259 prazas de intercambio para o curso 2010/2011 coa finalidade de potenciar a mobilidade dos estudantes da USC con outras universidades españolas no marco do programa SICUE.

### REQUISITOS DOS/AS CANDIDATOS/AS

Requisitos que deben cumprir os/as candidatos/as para solicitar a mobilidade:

- Estar matriculado na USC en estudos conducentes á obtención dos títulos de Diplomado/a, Enxeñeiro/a Técnico, Mestre, Licenciado/a ou Enxeñeiro/a.
- Ter superados na USC en data 30 de setembro de 2009:
  - En plans renovados: un mínimo de 30 créditos e estar matriculado en 30 créditos máis en diplomaturas e enxeñarías técnicas; 90 créditos e estar matriculados en 30 créditos máis en licenciaturas e enxeñarías.
  - En plans non renovados: ter superadas como mínimo a metade das materias do primeiro curso da titulación en diplomaturas ou enxeñarías técnicas e o equivalente a un curso e medio en licenciaturas ou enxeñarías, e estar matriculado en non menos da metade de materias equivalente a un curso académico.
  - En ensinanzas de grao: ter superados un mínimo de 60 créditos e estar matriculados en 30 créditos máis.
- Os alumnos de titulacións de só segundo ciclo ou ben dun segundo ciclo que non resulte continuación directa dun primeiro ciclo de orixe (segundo os planos de estudos anteriores ao RD 1393/2007 de 29 de outubro), establécense os seguintes requisitos:
  - Para o primeiro ano destas titulacións non se poderá solicitar o intercambio SICUE. O estudante poderá solicitalo unha vez estea matriculado no primeiro curso, para o seguinte, sempre que cumpra o resto dos requisitos que establece esta convocatoria. Para o número de créditos superados terase en conta os seus estudos de primeiro ciclo.

- Para o cálculo da nota media destes alumnos teranse en conta a media do primeiro ciclo máis os créditos que o alumno puidera ter superados en data 30 de setembro do curso anterior ao da solicitude. É requisito para solicitar un intercambio SICUE nestes casos estar matriculados dun mínimo de 30 créditos.
- Quedan excluídos do programa de mobilidade SICUE os planos de estudos de máster e doutorado.

### **NORMATIVA APLICABLE Á CONVOCATORIA**

- A mobilidade do estudante basearase no acordo académico, no que se describirá a actividade que se desenvolverá no centro de destino, que será recoñecida automaticamente polo centro de orixe. En ningún caso poderán ser incluídas nos acordos académicos materias cualificadas con suspenso con anterioridade na USC.

O acordo deberá incluír polo menos unha carga de estudo equivalente a 20 ou 40 créditos ECTS para un ou dous cuatrimestres respectivamente. O número máximo de créditos que se poden incluír no acordo de estudos será o equivalente a 60 ECTS para un curso académico completo ou o equivalente a 30 ECTS para un cuatrimestre.

O acordo académico só poderá ser modificado no prazo de 1 mes a partir da incorporación do estudante ao centro de destino.

- Un mesmo beneficiario non poderá obter máis dun intercambio SICUE na mesma universidade, nin máis dun en cada curso académico.

### **DOCUMENTACIÓN**

Os estudantes que desexen tomar parte nesta convocatoria deberán presentar por duplicado a seguinte documentación:

- Impreso de solicitude de mobilidade cun máximo de 3 opcións debidamente cuberto e asinado polo interesado.
- Memoria xustificativa da súa petición (2 folios máximo)
- Fotocopia do expediente académico
- Fotocopia da súa matrícula actual
- Fotocopia do DNI

### **PRAZO E LUGAR DE PRESENTACIÓN**

A solicitude efectuarase online a través da Secretaría Virtual. Imprimíranse 2 exemplares da mesma e presentáranse, xunto co resto de documentación requirida, do 26 de xaneiro ao 19 de febreiro de 2010 no Rexistro Xeral da USC, sito na Reitoría da USC (Colexio de San Xerome - Praza do Obradoiro s/n, Santiago de Compostela) e no Rexistro do Campus de Lugo, situado no edificio de Servizos administrativos da

Biblioteca Intercentros (Avda. de Bernardino Pardo Ouro s/n, Fingoi - Lugo). Tamén poderán presentarse nas formas e lugares establecidos na Lei de réxime xurídico das administracións públicas e do procedemento administrativo común.

## **LUGAR DE NOTIFICACIÓN DOS ACTOS DERIVADOS DA CONVOCATORIA**

Consonte co Artigo 60.5.b), o taboleiro de anuncios no que se efectuarán as sucesivas comunicacións será o da Reitoría, sen prexuízo da súa publicación complementaria en medios electrónicos ou noutros taboleiros da USC.

## **ADMISIÓN DE ASPIRANTES**

A Vicerreitoría publicará, nos días seguintes despois de finalizado o prazo de presentación de solicitudes, no taboleiro da Reitoría e na páxina web da Oficina de Relacións Exteriores ([www.usc.es/internacional](http://www.usc.es/internacional)) a relación de estudantes admitidos e excluídos.

Para emendar os defectos da publicación anterior os aspirantes non admitidos e excluídos poderán xustificar o seu dereito a ser admitidos, no prazo de 10 días naturais, contados a partir do día seguinte á publicación, quedando excluídos definitivamente de non facelo.

## **COMISIONS DE SELECCIÓN**

En cada un dos centros da USC nomearase unha comisión de selección encargada da selección dos estudantes, composta por un mínimo de tres membros, obrigatoriamente un deles será o/a coordinador/a SICUE do centro.

## **SELECCIÓN**

O proceso de selección constará dunha única fase na que se terá en conta:

- Nota media do expediente académico calculada de acordo co establecido no artigo 5 do RD 1125/2003.

Para o cálculo da nota media teranse en conta as cualificacións obtidas até o 30 de setembro de 2009.

As comisións de selección poderán establecer unha nota media mínima para poder obter unha praza de intercambio. Neste caso as comisións terán que facela pública no centro con carácter previo á valoración das solicitudes presentadas.

- Memoria xustificativa (máximo 1 punto).

## **RESULTADO FINAL**

Finalizada a fase de selección, as comisións de selección elaborarán unha proposta de resolución (con seleccionados e suplentes) que farán pública nos taboleiros dos centros.

Contra esa proposta os interesados poderán presentar unha reclamación perante a Comisión de selección no prazo de 10 días naturais, contados desde a data da súa publicación. Transcorrido ese prazo, e analizadas, de ser o caso, as reclamacións, remitiráselle a proposta á Vicerreitoría de Política Internacional, quen resolverá definitivamente por delegación do reitor da Universidade. Esta proposta deberá ser remitida a Vicerreitoría antes do 15 de marzo de 2010.

A praza de mobilidade SICUE non dará lugar ao aproveitamento de axuda económica. Con todo, para poder solicitar a bolsa SÉNECA é indispensable obter previamente unha praza de mobilidade SICUE ao abeiro desta convocatoria, e cumprir os requisitos que estableza o Ministerio de Ciencia e Innovación.

### **ACEPTACIÓN OU RENUNCIA**

Os estudantes que obteñan unha praza de intercambio SICUE disporán dun prazo de 10 días naturais a partir do día seguinte á publicación da relación definitiva para ACEPTAR ou RENUNCIAR a súa praza. As aceptacións ou renuncias presentaranse por escrito no Rexistro Xeral da USC nos modelos do programa SICUE.

### **OBRIGAS DOS/AS ESTUDANTES SELECCIONADOS/AS**

Os estudantes que sexan seleccionados están obrigados a:

- Presentar na Oficina de Relacións Exteriores o Acordo académico (modelo C) por triplicado e debidamente cumprimentado antes do 15 de setembro de 2010, momento no que recibirá a correspondente credencial de estudante de intercambio SICUE.
- Matricularse na USC nas datas que se determinen.
- Unha vez na universidade de destino os estudantes deberán:
  - Dirixirse á unidade administrativa correspondente, achegando: exemplar do acordo académico debidamente asinado pola USC, que se asinará na universidade de destino e devolverase á USC nun prazo non superior a 40 días a contar dende a súa incorporación.
  - Matricularse na universidade de destino tendo en conta que as taxas de matrícula serán aboadas exclusivamente na USC.
  - Facer chegar a Oficina de Relacións Exteriores da USC o certificado de chegada debidamente cumprimentado.
- Unha vez finalizado o intercambio o estudante deberá facer chegar á Oficina de Relacións Exteriores da USC o certificado de fin de presenza.

### **NORMA DERRADEIRA**

O procedemento de concesión destas prazas considérase iniciado de oficio pola presente convocatoria.

Contra a presente resolución, que esgota a vía administrativa, poderase interpoñer recurso contencioso-administrativo perante o Xulgado do contencioso-administrativo de Santiago de Compostela/Lugo no prazo de dous meses a contar desde o día seguinte á súa recepción, de conformidade cos Artigos 46 e 8.2.a) da Lei da xurisdición contencioso administrativa, aprobada por Lei 29/1998, de 13 de xullo.

Con todo, os interesados poderán interpoñer recurso potestativo de reposición no prazo dun mes perante o órgano que o ditou. Neste caso non se poderá interpoñer o recurso contencioso-administrativo anteriormente indicado en tanto non recaia resolución expresa ou presunta do recurso administrativo de reposición, ao abeiro dos artigos 116 e ss. da Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro.

Santiago de Compostela, 25 de xaneiro de 2010

Vicerreitor de Política Internacional  
Resolución de 21 de xaneiro de 2010  
A Vicerreitora de Cultura

  
  
Elvira Fidalgo Francisco